

PAULO ME LETA TAITUS BAU ME

Paulo Taitus ne Jewablenige

1 ¹ Cane Paulo Acejiyame me kaakesea bägrä gäne, piyepu Yeesu Keriso me ätyepäneji biname gäne. Cäme kaakesea lui teeme jäjäcräneji biname bine ätityerame Yeesu ne cängena ätrungame, piyepu toraca mene poto cidi me teebibine cängena umle wawename peei cabu teepi otnime, ² cuta piyepu teeme ngene atwanena bine Yeesu cabu acraname iyeteta ireclota tääpume. Yoo, Acejiyame me mene iyeta lui toraca gyene; tabe lui agedna cabu ca mene jejuji peei ireclota mibibine ceerame. ³ Piba teeme singi padare cabu ca tabe peei ne jewabudnituji Miiji Mene ca. Yoo, Acejiyame mime niiya cabu ca Äsecerayame tabe te cebine ituge jaji egä Miiji Mene biname bine jajanename.

⁴ Taitus, cane yoogärenine määme bau me. Maane cäme toracarage bägrä pana gäte, ingle mime ätrunga yepä gyene Acejiyame bau. Acejiyame mime Babe piyepu Keriso Yeesu mime niiya cabu ca Äsecerayame, teeme miiji te määme cabu lenajame piyepu teepi poode meebine ceerame.

Taitus me Kaakesea poto cidi me Krete Curä cabu

⁵ Yoo, cane peema meebine itu naabmalepene Krete Curä cabu mime kaakesea ne cängena apirame. Maane mope biname bine jejäcremepi iyeta ätrunga ingle tääpume lui cewe maramara cabu ta teepi te ätrunga biname bine opo wawename. Pui mene cane meebine itu naajepene, pepu pana jewenepi. ⁶ Epu biname bine jejäcremepi ätrunga ingle mope biname me lenajame lui cina conocäco mule taatu jaawenemusi; biname lui te yepä taatu coga cama cängena yaanajuge, piyepu lui me bägrä ätrunga cama gemi, piyepu mage babe bime mene cängena jäätacijemusi. ⁷ Yoo, ai ingle naace gyene pepu opo wawena biname te Acejiyame tääpume teeme kaakesea jaawenuge, tabe miiji conocäco lenaja, nuuja biname cina piba äblicäco teebine aitneja. Tabe miiji nuuja biname bime mene

ätecija, lica teeme singi taatu wawena. Tabe miiji lica watata claabe me äbita, coo sice buduma lenaja, coo biname bine papa agleca. Tabe miiji lica conocono singi cama lenaja rarekaake täápume. ⁸Yepä, tabe miiji catecewe biname bine cängena ire jaatwemuge, piyepu iyeta nuuja miiji mule täápume singi. Tabe miiji cängena ngene atwanena cama piyepu conocäco mule cama yaanajuge. Tabe miiji teeme ngenecu Acejiyame bau yaacituge teeme singi taatu ngenecu kokre cama wawename. ⁹Taba miiji toraca mene ne cängenarage jäätrunguge, pui mene ne lipu ituge abiberäja. Peei ätrunga cabu ca tabe ibibi pa läbitepi poto bine kokre ceerame toraca abiberäja ca, cuta piyepu eei biname bime mule bine awabudnitame egä conocono, lui cina toraca mene ne jiciseräjini.

¹⁰Bucurage äciseräja biname piti nemi puma, maane lui bine miiji cängena ablaweja. Teepi mene papapapa jiiemus, nuuja biname bine angletnejame. Bucurage pui angletneja biname lui Israela biname bime sasa cotre mule cabu itu yaacrajepi, piyepu teeme täápume Acejiyame me tääpe cabu cewecu lui baborage gwidape gyene. ¹¹Maane teebibine bojä jewenemepi, inge teepi biname yepäyepä teeme bägräwale cama ngenecu mäpu me jaawenemusi teeme abiberäja ca. Teepi ai ne naace name pi jaawenusi, inge teepi singisingi gemi rarekaake päpäname. ¹²Yoo, yepä Krete curä babo biname te toraca mene itu jiiemuji teeme binamewale poto cidi me egä, “Krete biname lui babo walya biname gemi. Teepi niiya girigale biname gemi. Ngänu gyene teepi kaakesea täápume durau gemi, yepä teepi baborage singi deedei täápume.” ¹³Yoo, peei mene toraca gyene, peei name pi Krete biname bine kokre cama eblawäjemepi teeme ätrunga cängena me wawename. ¹⁴Teepi miiji Israela biname bime itemene bine abmala toraca mene taatu oomlaname, cuta piyepu pui biname bime cotre mene abmala, lui cina toraca gaabe ne ituge ägyi. ¹⁵Yoo, biname lui te epucäco ngenecu cama birige, tabe miiji ne jääpänuge iyeta gwidape cabu, yepä lui biname me ngenecu niiya piyepu ätrunga cäco birige, tabe niiya ne jääpänuge iyeta gwidape cabu, inge naace popi teeme niiya ngene atwanena piyepu asicnenta cabu ca, tabe äblicäco miiji ne päpäna. ¹⁶Pepu biname cina jiiucusi egä, “Cine umle gemi Acejiyame,” yepä teeme niiya ireclota cabu ca biname cina opo yaawatnusi egä teepi toraca umle lica gemi. Teepi niyarage piyepu ätecija cäco biname gemi, äblicäco nuuja miiji mule ne wawena.

Toraca Abiberäja Agesa

2 ¹Yoo, maane teebibine umle jewenemepi lui mule miiji gyene ätrunga biname bime täápume. ²Modamoda rooriye bine maane ebiberäjemepi teepi sice buduma gone äbitame, yepä cängena ngene atwanena piyepu ngenecu kokre cama lenajame. Teebibine jejemepi egä toraca ätrunga cama cängena lenajame, biname bine owecu wawename,

piiyepu lica ätrunga gaabe ne abmala mäpu te liba teeme bau me täduge. ³Pepu pana maane molyege bine jejemepi teepi Acejiyame me jājācrāneji biname pana lenajame, lica niya mene iicemame nuuja biname poto cidi me, piiyepu lica sice täapume singi lenajame, yepā miijirage abiberāja biname täapume lenajame. Teepi miiji mamye magebi bine abiberājame ⁴teeme rooriye piiyepu bāgrā bine teeme ngenecu cabu acraname, ⁵piiyepu cāngena ngene atwanena cama lenajame. Teepi miiji teeme mene piiyepu teeme mule ire atwemame ngenecu epucāco lenajame, teeme mete kaakesea cāngenarage wawename, piiyepu teeme bāgrā bine cuta teeme nuuja binamewale bine cāngena owecu cama ätityerame. Teepi miiji teeme rooriye bime singi ne jaawenusi. Piba nuuja biname te äblicāco niya mene iicema Acejiyame me mene poto cidi me.

⁶Cuta pepu pana maane mamye rooriye bine jejemepi cāngena ngene atwanena cama lenajame. ⁷Yoo, teeme täapume miiji gaabe ne maane määme ireclota cabu ca eboclomtepi. Maane singi äbitepi toraca ngene atwanena täapume, piiyepu määme abiberāja kaakesea ne cāngenarage jewenepe. ⁸Maane toraca umle cama mene jicemepi, siige nuuja biname te piba määme mene äblicāco äsäda, piiyepu lui te singi määme kaakesea äseblecājame, tabe opo yaanajuge ingle teeme nuuja aitna mene lica gyene mime poto cidi me.

⁹Biname lui cina aletnāneji gemi daremu cāco kaakesea wawename, maane pui biname bine jejemepi ai gawecewe yageyame bime mene äteciyame, teebibine ngenecu miiji me wawename. Teepi miiji lica teeme mene äciserāja, ¹⁰piiyepu miiji lica teeme poto gwidape ero ca waadena, pātā teepi miiji teemāmu awabudnita egā teepi miijirage gemi, piiyepu toraca ngenecu cama kaakesea jaawenusi. Piba teepi Acejiyame mime niya cabu ca Äsecerayame me mule babo me jaawenusi iyeta teeme ireclota cabu ca.

¹¹Acejiyame teeme miiji mule ne itu jewabudnituji Yeesu Keriso me kaakesea cabu ca, iyeta biname bine äsecerame niya mule cabu ca kirece ireclota ne päpāname. ¹²Peei miiji mule te mibibine nibiberājninuge Acejiyame cāco lenaja ne piiyepu niya singi bine ägyemame, piiyepu nibiberājninuge ai gawecewe me ireclota cabu toraca ngene atwanena cama conocāco lenajame Acejiyame täapume. ¹³Mine cuta pepu jewagrijenisi pui miijirage bimu ne, Yeesu Keriso mime caburage Acejiyame piiyepu niya cabu ca Äsecerayame te liba cire tacnenutepi jamyacu apacljera cama. ¹⁴Tabe teemāmu mime täapume äyemaluji naace täapume mibibine iyeta conocono mule cabu ca äsecerame, piiyepu ngenecu epucāco me wawename mine teeme täapume lenajame, piiyepu singi äbitame miiji mule bine wawename.

¹⁵Yoo, maane biname bine cāngena ebiberājemepi peei mule poto cidi me, piiyepu jejemepi pepu wawename. Wālu gone biname bine

ablawejame piyepu nuuja bine ngenecu kokre ceerame, ingle Acejiyame te meebine ai kaakesea itu nääcärepi, peei name pi biname cina miiji umle äbitame egä mäame kaakesea poto cidi me mene lui conocäco gyene.

Keriso me Biname cina Miiji Apu Mule Acata

3 ¹Yoo, maane biname bine puma cääri umle jewenemepi teepi mope biname piyepu teeme ätityera biname bime mene ätecijame piyepu wawename. Mope biname ngena miijimiji kaakesea täapume singi, biname cina miiji peei ne ngenecu poode cama wawename. ²Teebibine jejemepi egä äingeja mene gone, nuuja biname ne uudunyera gone, yepä miiji owelaamelame lenajame, piyepu nuuja biname ne niinäce gaabe me acitame. ³Yoo, ujarage mine cuta piyepu buduma, ätecija cäco, toraca gaabe umle cäco ge. Bucurage niija singi cina mibibine itu niwadininusi. Mine ngenecu niija cama cuta ninajininuge mime nuuja biname poto cidi me, piyepu teebine ire patre yaaglusi. Nuuja biname cina mibibine nimugetninusi piyepu mine teebibine cuta jäämugetnemusi. ⁴Yepä, Acejiyame mime niija cabu ca Äsecrerayame me padare te liba tatyaramtuji mine teeme owecu piyepu ätityera cama lenajame, ⁵tabe piba mibibine nisechräinuji pui niija ireclota cabu ca. Yoo, lica ge mime miiji waweneca name pi tabe mibibine nitityärinuji, yepä tabe owecu ge mime täapume. Tabe mime niija mule nicisäjinuji, mine piba kirece ireclota cabu me ebäcnujisi. Peei lui Aceji Seemo me kaakesea mime yepäyepä cabu. ⁶Acejiyame te teebine mime bau me ituge ätyepa Yeesu Keriso mime Äsecrerayame me miiji kaakesea name pi, ⁷naace täapume egä mine teeme owecu mule ca conocäco äbitame Acejiyame me opo gaabe je, piyepu iyeteta ireclota ne päpäname, lui ireclota täapume mine mime ngene atwanena teeme cabu ituge acrana. ⁸Mine umle gemi egä peei mene toraca gyene.

Yoo, Taitus, cane singi maane mene cängena jajanename iyeta peei gwidape poto cidi me. Piba lui cina Acejiyame ne jäätrungusi teepi teeme ireclota teebine yääcärusi miiji mule teeme täapume wawename. Piba teeme ai gawecewe ireclota lica papa me äbita, yepä peei cabu ca miiji te tädenige iyeta biname bime cabu me. ⁹Papa äciseräja cabu gone abacita, piyepu bucurage mene gone ätecija Israela biname bime kaakesaare poto cidi me. Drowä mene piyepu äciseräja Israela biname bime cotre poto cidi me jigyemepi, ingle naace gyene nuuja miiji te lica tädenige pepu mule cabu ca. ¹⁰Biname lui te weeme ingle biname bine yäaplegicmuge, maane teebine umle mene jejepi teeme peei mule ne abmalame. Yoo, tabe liba mäame mene lica pa näätecijepi, teebine cääri jejepi, siige tabe liba cerämu ätecija cäco yaanajuge, piba ingwe ca ten cama gone abasuta. ¹¹Weene umle gemi egä pepu biname me mule baborage conocono gyene.

Teeme niiya mule te teebine jaawabudnituge egä conocono biname gyene tabe.

Ai Peba me Apira Mene

¹²Yoo, cane liba mime biname Artema, coo pama Tukikus ne, mäame bau me pa jäätyepepene, maane piba wata tädepi căme bau me Nikopoli cewe me. Cane ngene bii jotwananine ai kămäge me buuwe padare puma lenajame. ¹³Jenas, pui cotre abiberāja biname, cuta piyepu Apolo weene teebibine cāngena äätityärepi teeme kaakesea gaabe cabu otnime, piyepu teeme singi gwidape cāngena ääcärepeye. ¹⁴Yoo, mime ätrunga binamewale miiji amacetnäjäneji lenaja iyeta miiji mule wawenecame, biname lui cina singi cama icrajinige teebibine cāngena ätityerame, ingle miiji lica gyene teepi kaakesea cāco lenaja.

¹⁵Yoo, cane cama lui biname teepi iyeta meebine sebore naawenisi. Cuta piyepu cime ätrunga binamewale puma, maane cime täápume sebore jewenemepi.

Acejiyame me miiji te weeme iyeta bime cabu lenajame.

Cane ngii Paulo, siige căme mene.